

# 菩薩摩訶薩隨喜迴向諸功德當學般若波羅蜜

「大智度論」集粹之廿八

智  
銘

佛言：「一切求聲聞、辟支佛人布施時、持戒時，三昧、智慧、解脫、解脫知見，欲以隨喜心過其上者，當學般若波羅蜜。」

隨喜心者，隨喜名有人作功德，見者心隨喜歡，讚言：善哉！在無常世界中，為癡闇所蔽，能宏大心，建此福德。如是有人行施，有人受者，有人在邊隨喜，功德俱得二主不失，如是相名為隨喜。以是故菩薩但以隨喜心，過於求二乘人上，何況自行！

聲聞、辟支佛行是布施，菩薩於旁見之，一心念隨喜，讚言：善哉！以此隨喜福德，回向阿耨多羅三藐三菩提；為度一切眾生故，以此為得無量佛法故，以二種功德，過求聲聞、辟支佛人所行布施上。復次，以諸法實相智慧心隨喜故，過求聲聞、辟支佛人布施上。復次，菩薩以隨喜心生福德果報，迴向供養三世十方諸佛，過聲聞、辟支佛布施上。復次，菩薩以隨喜功德，和合無量諸餘功德，乃至法滅亦不盡。譬如少水置大海中，窮劫乃盡。持戒、三昧、智慧、解脫、解脫知見，亦如是。

聲聞、辟支佛功德法甚多，但僅說以上六事者，是此六法中，攝一切聲聞、辟支佛法。若說布施，已說信、聞等功德。何以故？聞已能信，信已布施。是施有二種：財施、法施。持戒攝三種戒：律儀戒、禪戒、無漏戒；定攝諸禪、定、解脫、三昧等；慧攝諸聞慧、思慧、修慧；解脫攝二種解脫：有為解脫、無為解脫；解脫知見攝盡智，自知漏已盡，於三界得解脫，於是中了了知見。復次，若不向涅槃功德，是中不說過去，以其功德薄故。

所謂菩薩勝於聲聞、辟支佛者，勝名俱於一事中，以智慧方便心力故得福多。智慧相應，勝聲聞、辟支佛布施等諸功德。是六法，初布施如檀波羅蜜義中，分別聲聞、辟支佛法說；持戒如尸羅波羅蜜義中，分別聲聞、辟支佛法說；三昧、智慧、解脫、解脫知見，如念佛義中分別說。

佛言：「一切求聲聞、辟支佛人，諸禪、定、解脫、三昧，欲以隨喜心過其上者，當學般若波羅蜜。」禪、定者為四禪、九次第定。解脫、三昧者，八背捨、三解脫門，慧解脫、共解脫、時解脫、不時解脫，有為解脫、無為解脫等。有覺有觀三昧，無覺有觀三昧，無覺無觀三昧；空三昧，無相三昧，無作三昧；如是等

諸三昧。

三昧有二種：一種慧解脫分；二種共解脫分。前者慧解脫分，不能入禪定，但說未到地中三昧；此中說共解脫分，具有禪、定、解脫、三昧，有說名、說義，畧說、廣說之分別。復次，禪、定、解脫、三昧，有二種：一者、離欲時得；二者、求而得，離欲時得者，前已說。求而得者，此中說。復次，禪、定、解脫、三昧，得之甚難，精勤求之乃得；菩薩但持隨喜心，便得過其上，是爲未嘗有法，是故重說。禪定、智慧，二法最妙，有此二行，所願皆得。解脫從此二法得，解脫知見，卽是智慧。

聲聞、辟支佛行布施、持戒，得以眼見，菩薩以隨喜心勝於聲聞、辟支佛。聲聞、辟支佛禪定、解脫、三昧，是不可見聞法，菩薩亦能以他心智而隨喜。摩訶衍法中，菩薩得無生法忍，斷諸結使，世世常不失六神通，以有漏他心智，能知聲聞、辟支佛無漏心，何況以無漏知他心智？當更知聲聞、辟支佛無漏心。

佛言：「菩薩摩訶薩行少施、少戒、少忍、少進、少禪、少智，欲以方便力迴向故，而得無量無邊功德者，當學般若波羅蜜。」施、戒、忍、進、禪、智是六波羅蜜，前已有說，是說總相，是說因緣，今後爲說者，是說別相，是說果報。所謂少施……少智者，仍是六波羅蜜，何以故？六波羅蜜義，在心不在事多少；菩薩行若多若少，皆是波羅蜜。如賢劫經說，八萬四千諸波羅蜜。此經中亦說：有世間檀波羅蜜，有出世間檀波羅蜜，乃至般若波羅蜜，亦有世間、出世間。

菩薩有種種因緣故少施：或有菩薩初發意，福德未集，貧故少施。或有菩薩聞施無多少，功德在心，以是故，不求多物布施，但求好心。或有菩薩作是念：若我求多集財物，破戒失善，心必散亂，多惱衆生；若惱衆生以供養佛，佛所不許，破法求財故。若施凡人，奪彼與此，非平等法，如菩薩法，等心一切，皆如兒子，以是故少施。復次：菩薩有二種：一者，敗壞菩薩；二者，成就菩薩。敗壞菩薩者；本發阿耨多羅三藐三菩提心，不遇善緣，五蓋覆心，行雜行，轉身受大富貴。以本造身、口、意業不清淨故，不得生諸佛前，及天上、人中無罪處，是名爲敗壞菩薩。

。如是人雖失菩薩心，先世因緣故，猶好布施，多惱衆生，劫奪非法，取財以用作福。成就菩薩者，不失阿耨多羅三藐三菩提心，慈悲衆生；或有去家受五戒者，有出家受戒者。在家菩薩雖行業成就，有先世因緣貧窮。聞佛法有二種施：法施、財施。出家人多應法施，在家者多應財施。以先世因緣故，不生富家，見敗壞菩薩輩作罪布施心不喜樂，聞佛不讚多財布施，但美心清淨施；以是故，隨所有物而施。又出家菩薩守護戒故，不蓄財物。又自思惟：戒之在德，勝於布施。以是因緣故，隨所有而施。菩薩如是等本生因緣，少施得大報，便隨所有多少而布施。隨所有多則多施，少則少施。佛欲讚般若波羅蜜功德大故，言少施得大果，功德無量。

布施雖少，皆迴向阿耨多羅三藐三菩提。菩薩作是念：我以是福德因緣，不求人天中王及世間之樂，但求阿耨多羅三藐三菩提。如阿耨多羅三藐三菩提無量無邊，是福德亦無量無邊。又以是福德度一切衆生，如衆生無量無邊故，是福德亦無量無邊。復次，是福德用大慈悲，大慈悲無量無邊故，是福德亦無量無邊。復次，菩薩福德諸法實相和合故，三分清淨：受者、與者、財物不可得故，具足般若波羅蜜。用是實相智慧布施故，得無量無邊福德。復次，菩薩皆念所有福德：如相、法性相、實際相故，以如、法性、實際無量無邊故，是福德亦無量無邊。

菩薩摩訶薩，觀諸法實相，知如、法性、實際，是無爲滅相，而更作無量無邊福德者，是因菩薩久習大悲故，大悲心爾時發起：衆生不知是諸法實相，當令得是實相；以精進波羅蜜故，還行福德業因緣，以精進波羅蜜助大悲心，施多施少，色法可分別故。戒中有五戒：一曰戒、十戒等，多少亦可知。餘四波羅，雖非可見聞，是多是少，亦皆可知。如忍有二種：一者、身忍；二者、心忍。身忍者，雖身、口不動，而心不能令不起。少忍故不能制心；心忍者，身、心俱忍，猶如枯木。復次，少忍者，若人擲罵不還報；大忍者，不分別罵者、忍者、忍法。復次，衆生中忍，是爲少忍，法忍是爲大忍。如是等分別少忍。少進者有二種：身進、心進。身進爲少，心進爲大；外進爲少，內進爲大；身

、口進爲少，意進爲大。如是等名爲少進。少禪者，欲界定，未  
到地，不離欲故名爲少，亦觀二禪，初禪則少；乃至滅盡定，有  
漏爲少，無漏爲大；未得阿鞞跋致，未得無生法忍禪是爲少，得  
阿鞞跋致，得無生法忍禪是爲大；乃至坐道場十六解脫相應定爲  
少，十七金剛三昧爲大。復次，若菩薩觀一切法常定無散亂者，  
無依止、無分別，是爲大，餘者皆爲少。慧有二種：一者、世間  
慧；二者、出世間慧。世間慧爲少，出世間慧爲大。淨慧、雜慧  
、相慧、無相慧、分別慧、不分別慧、隨法慧、破法慧、爲生死  
慧、爲涅槃慧、爲自益慧、爲益一切衆生慧等亦如是。復次，聞  
慧爲少，思慧爲大；思慧爲少，修慧爲大；有漏慧爲少，無漏慧  
爲大。發阿耨多羅三藐三菩提慧爲少，修行六度慧爲大；修慧爲  
少，方便慧爲大；諸地中方便展轉有大小，乃至十地，如是等分  
別多少。

佛歎菩薩奇特，於少事中得無量無邊功德，豈況大事！餘人  
多捨財，身、口勤苦得福少，持戒、忍辱、精進、禪定、智慧亦  
如是，不及菩薩少而報大。如是布施，等因少，餘人行是所得福  
報則少；菩薩摩訶薩以般若波羅蜜方便力迴向故，得無量無邊福。  
以是故說：欲行少施、少戒、少忍、少進、少禪、少智。當學般  
若波羅蜜。

佛言：「菩薩摩訶薩欲行檀波羅蜜、尸羅波羅蜜、羼提波羅蜜、  
毗梨耶波羅蜜、禪波羅蜜，當學般若波羅蜜。」五波羅蜜相與般  
若波羅蜜相，亦同、亦異。異者，般若波羅蜜各觀諸法實相故，  
不受、不著一切法；檀名捨內、外一切所有。以般若波羅蜜心行  
施，是時，檀得名波羅蜜。復次，五波羅蜜植諸功德，般若波羅  
蜜除其著心邪見。

爲何欲行檀波羅蜜，當學般若波羅蜜？蓋檀有二種：一者、  
淨；二者、不淨。不淨者憍慢故施，作是念：劣我者當與，我豈  
不能？嫉妬故施。作是念：我之怨憎，施故得名，如是勝我，今  
當廣施，要必勝彼。貪報故施，作是念：我施少物，千萬倍報，  
是故報施。爲名故施，作是念：我今好施，爲人所信，好人數中  
。爲攝人故施，作是念：我今施之，人必爲我。如是等種種雜結

行施，是名不淨。淨者，無是雜事，但以淨信心因緣果報，敬愍  
受者，不求今利，但爲後世功德，復有淨施，不求後世利益，但  
以修心，助求涅槃。復有淨施，生大悲心，爲衆生故，不求自利  
，早得涅槃，但爲阿耨多羅三藐三菩提，是名淨施。以般若波羅  
蜜心故，能如是淨施，以是故說：欲行檀波羅蜜，當學般若波羅  
蜜。般若波羅蜜力故，捨諸法著心，何況我心而不捨！捨吾我心  
故，身及妻子視如草土，無所戀惜，盡以布施，以是故說：行檀  
波羅蜜，當學般若波羅蜜。餘波羅蜜亦如是。以般若波羅蜜助成  
故。復次，諸餘波羅蜜，不得般若波羅蜜，不得波羅蜜名字，亦  
不牢固。五波羅蜜，不得般若波羅蜜，則不得增長，得是般若波  
羅蜜故，餘波羅蜜得增益具足。以是故，佛言欲行檀波羅蜜，當  
學般若波羅蜜。

佛言：「菩薩摩訶薩欲使身體與佛相似，欲具足三十二相，  
八十隨行故，當學般若波羅蜜。」迦旃延子阿毗曇毘婆沙中有說  
：「菩薩過三阿僧祇後，百劫中種三十二相因緣。」而三藏無  
有如是說。何以故？三十二相，餘人亦有，何足爲貴！如難陀先  
世時一浴僧衆，因作願言：使我世世端正淨潔。又於異世值辟支  
佛塔，飾以彩繪，莊嚴辟支佛像，作願言：使我世世色相嚴身。  
以是因緣故，世世得身相莊嚴，乃至後身出家作沙門，衆僧遙見  
，謂其是佛，悉皆起迎。難陀小乘，種少功德，尙得此報，豈況  
菩薩於無量阿僧祇劫中修立功德，世世形體而不似佛？又如彌勒  
菩薩白衣時，師名婆跋犁，有三相：一、眉間白毛相；二、舌覆  
面相；三、陰藏相。如是等，非菩薩亦皆有相，菩薩豈當三阿僧  
祇後乃種相好？復次，是摩訶衍中，有菩薩從初發心，乃至阿耨  
多羅三藐三菩提，初不生惡心；世世報得五通，身體似佛。

菩薩未得佛道，而身相似佛，是菩薩爲度衆生故，或作聲聞  
身、辟支佛身，或作菩薩身、佛身。如首楞嚴經中，文殊師利自  
說：七十二億反作一緣覺而般涅槃；又現作佛，是龍種尊。時世  
世未應有佛，而衆生見佛身，歡喜變化。菩薩有大神力，住十住  
地，具足佛法而住世間，廣度衆生故，不取涅槃，爲人說法，非  
眞佛身。雖爾度脫衆生，有量有限，佛所度者，無量無限。菩薩

雖作佛身，不能徧滿十方世界，佛身者普能徧滿無量世界，所可度者皆現佛身。菩薩現佛身與真佛身，有如是差別。

三十二相、布施等果報，般若波羅蜜無所有、如虛空，云何欲得相好，當學般若波羅蜜？蓋三十二相有二種：一者、具足如佛；二者、不具足。般若波羅蜜與布施和合故，能具足相好如佛；餘人但行布施等，相不具足。如檀越布施時，受者得色力等五事益身故，施者具手足輪相。戒、忍等亦如是。各具三十二相。足下安立相，是爲初相。佛世世一心堅固持戒，亦不令他破戒，以是業因緣故，得是初相，初相者，自於法中無能動者。離殺生因緣故，得長指相，離不與取業因緣故，得足跟滿相。以四攝法攝衆生業因緣故，得手足縵網相。以上妙衣服、飲食、臥具，供養尊長業因緣故，得手足柔軟相，修福轉增業因緣故得足趺高相。一一孔一毛生相，毛上向相。如法遣使爲福和合因緣，及迷疾誨人故，得妙瑞相。如法淨物布施，不惱受者故，得平立手過膝相；方身相。多修慚愧及斷淫邪，以房舍、衣服、覆蓋之物用布施故，得陰藏相。修慈三昧，信淨心多，及以好色飲食、衣服、臥具布施故，得金色相；丈光相。常好問義，供給所尊及善人故，得肌皮細軟相。如法斷了，不自專執，委以執政故，得上身如師子相；腋下滿相；肩圓相。恭敬尊長，迎逆侍送故，得身直廣相。布施具足充滿故，得七處滿相。一切捨施無所遺惜故，得方頰車相。離兩舌故，得四十齒相；齒齊相；齒蜜相。常修行慈，好思惟故，得白牙無踰相。離妄語故，得舌廣薄相。美食布施，不惱受者故，得味中最上味相，離惡口故，得梵身相。善心好眼視衆生故，得眼睫紺青相；眼睫如牛王相。禮敬所尊，及自持戒，以戒教人故，得肉髻相。所應讚歎者而讚歎故，得眉間白毫相。是爲用聲聞法三十二相因緣。

一切相皆是虛妄，一相尚不實，何況三十二相？而所以云佛

有三十二相者，蓋佛法有二諦：一者、世諦；二者、第一義諦。世諦故，說三十二相；第一義諦故，說無相。有二種道：一者、令衆生修福道；二者、慧道、福道故，說三十二相；慧道故，說無相。爲生身故，說三十二相；爲法身故，說無相。佛身，以三十二相、八十隨形好而自莊嚴；法身，以十力、四無所畏、四無礙智、十八不共法諸功德莊嚴。衆生有二種因緣：一者、福德因緣；二者、智慧因緣。欲引導福德因緣衆生故，用三十二相身；欲以智慧因緣引導衆生故，用法身。有二種衆生：一者、知諸法假名；二者、著名字。爲著名字衆生故，說無相；爲知諸假何名衆生故，說三十二相。

一切無漏法，十六行，三三昧相應故，皆名無相；佛欲令衆生解故，種種分別說。說一切諸佛法，以空、無相、無作印故，皆入如、法性、實際；而爲見色歡喜發道心者，現三十二相莊嚴身。復次，爲一切衆生中顯最勝故，現三十二相而不破無相法。言無相法者，爲破常、淨、樂相，我相，男女、生死等相，故如是說。以是故，佛法雖無相相，而現三十二相引導衆生，令知佛第一，生淨信故說三十二相無咎。

佛之所以相好莊嚴，以示衆生者，若佛但以妙法莊嚴其心，身無相好者，或有可度衆生，心生輕慢，謂佛身相不具，不能一心樂受佛法。衆生見佛身相威德，又聞音聲，皆歡喜信樂。復次，莊嚴物有內、外，禪定、智慧諸功德等，是內莊嚴，身相威德，持戒具足，是外莊嚴；佛內、外具足。復次，佛愍念一切衆生，出興於世，以智慧等諸功德，饒益利根衆生；身相莊嚴，饒益鈍根衆生。莊嚴開涅槃門；身莊嚴開天、人樂門。身莊嚴故，置衆生於三福處；心莊嚴故，置衆生入三解脫門。身莊嚴故，拔衆生於三惡道；心莊嚴故，拔衆生於三界獄。如是等無量利益因緣故，以相好莊嚴生身。

佛云：「欲生菩薩家，欲得鳩摩羅伽地，欲得不離諸佛，當學般若波羅蜜。」菩薩家者，若於衆生中發甚深大悲心，是爲生菩薩家，以佛子故，諸天龍、鬼神，諸聖人等無敢輕者，益加恭敬；不畏惡道，人、天賦處，不畏聲聞、辟支佛人、外道論師來

阻其心。復次，菩薩初發意，一心作願：從今日不復隨諸惡心，但欲度一切眾生，當得阿耨多羅三藐三菩提。復次，菩薩若能知諸法實相，不生不滅，得無生法忍；從是以住，常住菩薩道。如佛所說持心經中：我見錠光佛時，得諸法無生忍，初具六波羅蜜；自爾之前，都無布施、持戒等。復次，菩薩作是念：如恆河沙等劫爲一日一夜，用是日夜，三十日爲月，十二月爲歲；如是歲數過百千萬億劫，乃有一佛，於是佛所，供養持戒，集諸功德；如是恆河沙等諸佛，然後受記作佛，菩薩心不懈怠，不沒不厭，悉皆樂行。復次，菩薩於諸邪定五逆眾生，及斷善根人中而生慈悲，令入正道，不求恩報。復次，菩薩初發心以來，不爲諸煩惱所覆、所壞。菩薩雖觀諸法實相，於諸觀心亦不生著。菩薩自然口常實言，乃至夢中亦不妄語。菩薩有所見色，皆是佛色，念佛三昧力故，於色不著。菩薩見一切眾生流轉生死苦中，一切樂中，心亦不著，但作願言：我及眾生，何時當度？菩薩於一切珍寶，心不生著，唯樂三寶。菩薩常斷淫欲，乃至不生念想，況有實事。象生眼見菩薩者，卽得慈三昧。

菩薩能令一切法，悉爲佛法，無有聲聞、辟支佛法，凡夫之法種種差別。菩薩分別一切法，於一切法中，亦不生法相，亦不生非法相。如是等無量因緣，是名生菩薩家。菩薩家有二種：有退轉家，不退轉家；名字家、實家；淨家、雜家；有信堅固家、不堅固家。爲不退轉家，乃至信堅固家；欲得如是等家故，言欲生菩薩家，當學般若波羅蜜。

欲得鳩摩羅伽地者，或有菩薩從初發心斷淫欲，乃至阿耨多羅三藐三菩提，常行菩薩道，是名鳩摩羅伽地。復次，或有菩薩作願：世世童男，出家修道，不受世間愛欲，是名鳩摩羅伽地。復次，又如王子名鳩摩羅伽，佛爲法王，菩薩入法正位，乃至十地，故悉名王子，皆任爲佛。如文殊師利，十力、四無所畏等悉具佛事故，住鳩摩羅伽地，廣度眾生。復次，又如童子過四歲以上，未滿二十，名鳩摩羅伽。若菩薩初生菩薩家者，如嬰兒，得無生法忍，乃至十住地，離諸惡事，名爲鳩摩羅伽地。欲得如是

地，當學般若波羅蜜。

常欲不離諸佛者，菩薩世世所生，常值諸佛。有菩薩未入菩薩位，未得阿鞞跋致，受記別故；若遠離諸佛，便壞諸善根，沒在煩惱，自不能度，安能度人？菩薩未入法位，若遠離諸佛，以少功德，無六便利，欲化眾生，雖少利益，反更墜落，以是故，新學菩薩不應遠離諸佛。復次，菩薩作是念：我未得佛眼故，如盲無異，若不爲佛所引導，則無所趣，錯入餘道。設聞佛法異處行者，未知教化時節，行法多少。菩薩見佛，得種種利益，或眼見心清淨，若聞所說，心則樂法，得大智慧，隨法修行，而得解脫。如是等值佛無量利益，豈不一心求欲見佛！佛利益諸菩薩，離諸苦處，住世尊之位，以是因緣故，菩薩常不離佛。

菩薩福德、智慧具足故，乃應得佛，何況不離諸佛！以衆生有無量劫罪因緣故，不得如願；雖行福德而智慧少，雖行智慧而福德少，故所願不成。菩薩求佛道故，要行二忍：生忍、法忍。行生忍故，一切眾生中發慈悲心，滅無量劫罪，得無量福德；行法忍故，破諸法無明，得無量智慧。二行和合故，何願不得！以是故，菩薩世世常不離諸佛。菩薩常愛樂念佛故，捨身受身，恆念佛三十二相，八十隨行好、金色身，身出光明徧滿十方，如融閻浮檀金，其色明淨。行者是時都無餘色想，所謂山、地、樹、木等，但見虛空中諸佛身相。菩薩摩訶薩入念佛三昧，悉見諸佛，以攝心故，心清淨故。諸法從本以來，常自清淨，菩薩以善清淨心，隨意悉見諸佛。問其所疑，佛答所問。聞佛所說，心大歡喜，從三昧起，作是念：佛從何所來？我身亦不去。卽時便知諸佛無所從來，我亦無所去。復作是念：三界所有，皆心所作。何以故？隨心所念，悉皆得見，以心見佛，以心作佛、心卽是佛。心卽我身，心不自知，亦不自見。若取心相，悉皆無智，心亦虛誑，皆從無明出。因是心相，卽入諸法實相，所謂常空。得如是三昧、智慧已，二行力故，隨意所願，不離諸佛。菩薩得是三昧、智慧力故，或今身隨意供養諸佛，命終亦復值遇諸佛。以是故說：菩薩常不離諸佛，當學般若波羅蜜。